



生日

今晡日新曆二月二十八，佢个生日官到，韶早三月初一，佢个生日又過忒咧，在恁樣个日仔出世，佢乜盡無奈！

在佢該隻時代，當多人降下來無黏皮去報戶口。可能係耕種人做事做到無日無夜，無抽間去報，還較多个係看細人仔畜得生咧，正放心去報，所以當多人身分證頂个生日，摺爺哀記得个舊曆生日全全對毋著。佢身邊就當多恁樣个人，有一個還慢咧完半年。佢還有個好朋友，細細就無阿爸，屋下姊妹七、八個，厥姆顧三餐斯來毋掣，哪有心性去記細人仔个生日？所以佢一直毋知自家正式个生日係哪日，到厥俵仔大咧，就決定在慶祝母親節該時，續摺哀仔做生日，這係佢聽著最感心个生日。

佢生在該恁樣个時代，生日嘎一日斯無爭差，算來也真特別。聽佢姆講，佢爸係公務員，降細人仔有補助費好領，當然斯煞煞去報戶口，所以佢六姊妹个生日全無走盞。恁堵好佢擇該四年正一到个日仔降，係注定个，半點不由人。見佢看著有餐廳無斯遊樂區，講哪日生日个人有好優待，又偏偏毋識看著有二月二十九个，佢就怨嘆「生不逢時」，好空總係輪毋著。毋過，特殊个日仔還係有特別个好處，一到這日，當久無聯絡个朋友會想著佢，打電話來摺佢祝福，也有幾下十年無見个學生仔，用佢「面書」肚紀錄个生日摺佢相認。一個人尋著佢，牽連出一大堆同學，到這下還長透見面、食飯，師生情就恁樣綿延不斷。想真，還係愛感謝這特別个日仔。

這下个後生人全無過舊曆生日咧，所以佢四年正聽著一擺「生日快樂」；四年正食著一擺「生日雞卵糕」；四年正拿著一擺「生日禮物」，細人仔全無想著阿姆還有一隻安到舊曆个生日，久咧，佢也慣咧。想起厥爸雖然年年有生日，毋過長下分人毋記得，佢這隻阿姆个生日，因為日仔特殊，嘎記到當清楚，實在愛偷暢哪！

三年來無新曆生日咧，今晡日二月二十八，這不尷不尬个日仔，佢還係偷偷摺自家講：「生日快樂」。明年係閏年咧，等待屋下人在該日摺佢共下過這特別个日仔，期待佢兜帶分佢快樂、歡喜。少就珍貴，四年等著一到，也係特別寶貝呢！

作者：張美容

☆詞彙學習☆

【完半年】von ban^ˊ ngien：整整半年。

【續】sa^ˊ：順帶、順便。

【走盞】zeu^ˊ zan^ˊ：走樣。

【無斯】mo sii⁺：或者。

【想真】siong^ˊ zhin^ˋ：想清楚。

【不尷不尬】bud gam^ˋ bud gai^ˋ：不恰好。

☆文法學習☆

【見……】gien^ˋ……：每……。「見」是「見擺」的簡說，是「每次、每當」的意思。

例 1：佢見去臺北，就愛逛百貨公司。（我每次去臺北，就要逛百貨公司。）

例 2：佢見坐車就暈車。（他每次坐車就暈車。）